

適園叢書

張宗祥



通國書舍



張氏藏

西吳里語卷二

吳興宋雷著

道場山在郡城之西舊名雲峯後因人建廟以奉佛謂之道
場山唐中和閒如訥禪師辭師出遊師曰逢道卽止訥經
此山山故多虎訥策筇直上坐盤石虎伏其側三宿無傷
結庵居之名其處曰伏虎巖後起廊廡佛殿塑千羅漢于
中吳越時建正眞禪院後改爲妙覺寺又爲護聖萬壽禪
寺郡守錢信王洞皆有遊道場山詩宋元豐三年知州陳
洞奏改今額峯巒秀鬱水石森爽殊爲吳興佳勝有笑月
愛月伏虎步雲躡翠仰高宜晚望湖諸亭有虎跑泉一勺
泉應泉有瑤席池八德放生池蘇東坡遊道場詩云道場

山頂何山麓上徹雲峯下幽谷我從山水窟中來尙愛此
山看不足陂湖行盡白漫漫青山忽作龍蛇蟠山高無風
松自響誤認石齒號驚湍山僧不放山泉出屋底清池照
瑤席階前合抱香入雲月裏仙人親手植出山回望翠雲
鬟碧瓦朱甍縹緲閒白水田頭問行路小谿深處是何山
高人讀書夜達旦至今山雞鳴夜半我今廢學不歸山山
中對酒空三歎其弟穎濱轍次韻云兩山相負圍峯麓流
水重重注谿谷遊人上尋流水源未覺崎嶇病雙足山深
下視雲漫漫徑垂石底千屈蟠松林陰森白日靜忽驚人
世如奔湍客行不避苦寒出僧定端居不下席人生嗟與
草木同置身所在猶初植堂中白佛青髻鬢氣象沖澹非

人閒坐令遠客厭奔走徑欲築室依空山木魚琅琅夜將
旦星斗敲斜挂山半行役有程未可留將出山門復長歎
趙子昂道場山詩絕頂清秋陵翠煙登臨應費酒如川平
生能著幾兩屐負郭何須二頃田初日出雲光射地雙谿
入湖波接天升高望遠我所愛青壁有路何當緣宋道場
山千聖殿碑太平興國三年知州錢信撰有四庵四水流
芳歸雲半山而歸雲在山麓境尤勝

唐湖州左史江琛取裴光書割字合成文理詐爲徐敬業反
書以告遣使推之款云書是光書語非光語前後三使並
不能決別委能事人張楚金劾之如前款楚金憂懣臥向
窗日影透窗向日視其書乃葺紙也取書投水中字字解

散琛伏罪斬之

宋陳堯佐湖州芳菲園詩云盡日芳菲園不見芳菲好茂草
與斜陽脈脈情多少

姜夔字堯章鄱陽人移居苕谿與白石洞天爲鄰因號白石
道人有詩云南山仙人何所食夜夜山中煮白石世人喚
作白石仙一生費齒不費錢仙人食罷腹便便七十二峯
生肺肝

云

夔善書有續書譜行於世

章昭達字伯通武康人也祖道蓋齊廣平太守父法尚梁揚
州議曹從事昭達少時遇相者謂昭達曰卿容貌甚善須
小虧損則當富貴梁大同中昭達爲東宮直後因醉墜馬
鬢角小傷昭達喜相者曰未也及侯景之亂昭達率募鄉

人入援臺城爲流矢所中眇其一目相者見之曰卿相善矣不久當貴後歷建大功官至開府儀同三司初陳世祖嘗夢昭達升於台鉉及旦以夢告之至是侍讌世祖顧昭達曰卿憶夢不何以償夢昭達對曰當效犬馬之用以盡臣節自餘無以奉償

沈文季元徽中轉祕書監出爲吳興太守文季飲酒至五斗妻王錫女亦至三斗文季在郡與妻對飲竟日而視事不廢

漢哀平閒錢遜爲廣陵太守避王莽亂徙居烏程子晟吳興錢氏當自遜始

長興有九女冢隋時有媼生九女翁罵曰生女不生男死誰

西望山言卷二
三
瘞我夫婦當食烏鳶腹矣後九女俱適大家感父之言二
親死鳩財厚葬侈擬王侯黃巢之亂發其墓其顛有穴可
縫而下見石屋一區壁閒隱若碑刻圖畫

唐劉長卿過吳興湖南朱處士別業詩云杜門成白首湖上
寄生涯秋草閒三徑寒塘獨一家烏歸村落靜水向縣城
斜愛汝醒還醉東籬菊正花長卿又酬荅谿梁耿別後見
寄詩云清川永路何極落日孤舟自攜烏向平蕪遠近人
隨流水東西白雲千里萬里明月前谿後谿惆悵長沙謫
去江潭芳草萋萋

永明六年西陵戍王杜元懿啟吳興無秋會稽豐登商旅往
來倍多常歲西陵牛埭稅官格日三千五百元懿如卽所

見日可一倍盈縮相兼略計年長百萬浦陽南北津及柳
浦四埭乞爲官領攝一年格外長四百許萬西陵稅前檢
稅無妨稅事餘三埭自舉腹世祖下其議顧憲之議曰吳
興頻歲失稔今茲尤饑去之從豐良由饑棘或徵貨賀粒
還拯親累或攜老弱陳力糊口埭司責稅依格弗降舊格
新減尙未議登格外加倍將以何術皇慈恤隱振廩蠲調
而元懿幸災摧利重增困瘼不可從世祖並從憲之議

吳興郡城中平康巷妓張真奴藝色冠於時每月遇初三二
十七日雖鼎貴鉅富狎暱咸謝絕之呂洞賓輒以是日化
爲大賈往挑之終不變後洞賓度真奴尸解而去巷又名
鳴珂今名小市巷

石林宋尙書左丞葉夢得所居也在弁山太陽隴萬石環之故名勝曰石林精舍其一堂曰兼山軒曰負日曰躋雲有池以聚眾泉曰碧琳東西兩巖東有二亭曰巖居曰眞意又有東堂曰承詔後有石環立如林最爲絕勝上有亭據險以望太湖曰知止其西有庵曰淨樂又有堂在精舍之前曰求志在西山之下曰從好其鄰有朱氏怡雲庵涵空橋玉澗故公復以玉澗名書大抵北山一徑產楊梅盛夏之際十餘里閒朱實離離不減閩中荔枝也石林之勝在郡中最古今皆沒於蔓草矣

沈憲字彥章武康人也南宋明帝與憲棊謂憲曰卿廣州刺史才也補烏程令甚著政績太守褚淵歎之曰此人方員

可施憲爲會稽左軍司馬帶山陰令政聲大著孔稚珪請
假東歸謂人曰沈令料事特有天才

茹法亮武康人永明元年除龍驤將軍明年詔曰茹法亮近
在湓城頻使銜命內宣朝旨外慰三軍義勇齊奮人百其
氣險阻艱難心力俱盡宜沾茅土以甄忠績封望蔡男

梁丘仲字字公信烏程人少好學讀書以中宵鐘鳴爲限靈
鞠從孫嘗稱爲吾家千里駒王儉亦曰東南之美復見丘
生舉高第未調還鄉里家貧乃結羣盜爲之計劫掠三吳
仲字聰明有智略羣盜畏服所行皆果故亦不發後爲于
湖令太守呂文顯當時倖臣陵詆屬縣仲字獨不爲屈明
帝卽位爲曲阿令以拒王敬則有功乃遷山陰令甚有聲

百姓謠曰二傅沈劉不如一王蓋傅琰文沈憲劉元明相繼宰山陰並有政績而仲孚過之故云長於治劇適權通變爲天下第一號稱神明累遷豫章內史撰皇興二十卷南宮故事一百卷尙書具事雜儀行於世

梁震州刺史吳興太守杜龕京兆杜陵人龕王僧辯壻也以陳武帝非素貴以法繩其宗門武帝銜之及僧辯敗龕乃據吳興與義興太守韋載同舉兵陳武帝遣周文育討之龕部將杜泰私通而降因而兵敗陳文帝負龕出項王寺前斬之

宣城劫帥紀機郝仲等聚眾千餘人侵暴吳興郡境陳文帝時爲太守討平之

胡潁字方秀吳興東遷人也其先寓居吳興土斷爲民偉姿容性寬厚陳武帝與其同郡接遇甚隆嘗隨武帝鎮京口破周郭元又從武帝襲王僧辯與周文育討杜龕於吳興屢建武功天嘉元年除散騎常侍吳興太守卒諡壯侯配享武帝

沈恪字子恭武康人深沈有幹局梁新渝侯爲郡將召恪爲主簿陳武帝以恪同郡情甚暱武帝討王僧辯恪與其謀武帝使恪還武康招集鄉兵以備杜龕及僧辯誅龕果遣副將杜泰率眾襲長城恪時已率眾出縣誅龕黨龕誅以恪監吳興郡武帝受禪使恪勒兵入辭因衛敬帝如別宮恪乃排闥入見武帝叩頭謝曰恪身經事蕭家今日不忍

見許事分受死耳決不奉命

梁尼諱道蹟號總持得法於菩提達磨遁居湖州卞嶺之頂
峯晝夜誦法華經滿十萬部幾二十年不下山後歸寂塔
全身於結廬之所至大同元年塔內忽生青蓮花一朵道
俗異之因啟看尼肉身不壞其花從舌根生又於中獲蓮
經一部州郡錄實表奏敕置法華寺

唐吳興僧抱玉母梅氏孕協靈祥卽惡輦穢旣誕齠歲卽思
佛乘遂於尼總持法華寺出家願誦蓮經日持七部年二
十詣京受戒時肅宗夜夢吳僧誦法華經口出五色光及
抱玉至召見帝曰朕所夢者音容宛若遂賜坐誦經至隨
喜功德品口角放五色光帝大悅曰朕夢所睹之光卽此

也賜名大光封天下上座後以慈親在吳上表乞歸許還
詔湖州以官緡增廣寺宇賜墨詔一道多寶塔一所彌勒
佛一軸金字蓮經一部七寶念珠一副奴一人侍行乃歸
依法華寺松徑築庵以居至永貞改元冬往辭刺史顏防
善曰余去矣還寺恬然坐逝異香三日不消葬於庵側時
眾咸謂師卽梁朝尼總持後身光嘗見神人從天而降按
摩其心光偶山行忽墜龍井恍若神人捧上歸吳地旣卽
止烏程相國李紳刺於湖醉於持經道場夜醒忽見白光
滿室往覘師師方宴座持經光起面門經聲息光亦隨斂
唐大光和尚神異碑李紳撰在法華寺大光和尚道蹟碑

陳文在撰

唐廣德初慶澄爲湖州左衛兵曹參軍時巨盜袁晁陷浙西
德清人沈皓等聚眾應之刺史獨孤問俗遣將軍辛敬順
築塞拒遏久之皓降以澄兼德清武康二縣令澄因荒亂
勑爲邑制招復流亡朞年繁庶

王穀山東人宋政和初知德清時蔡京爲相括責民茶租甚
急初湖州山閒產茶最盛穀令民盡伐去有不信者委曲
諭曰茶株可復栽若租額一立則永爲子孫害矣其後德
清茶租果在最輕等金鵝山下有蕩產藕甚佳司漕者取
貢頗爲民病穀至應貢不缺但所獻者一不封裹迨至京
色味俱變不稱上供遂不復取邑中免擾焉

唐耿緯湖州西亭詩云高亭賓客散暑夜醉相和細雨凝塵

集微涼待扇過風還池色定月轉樹陰多遙想隨行者珊
珊動曉珂

漢吳羌避王莽之亂隨梅福入吳攜妻子徙于會稽之餘不
鄉以谿南山水紆鬱因避處焉時稱高士後人名其所居
曰吳羌山

陳衡陽獻王昌字敬業高祖第六子也梁太清末高祖南征
李賁命昌與宣后隨沈恪還吳興及高祖東征侯景昌與
宣后文帝在吳興並爲景所囚景平拜長城國世子吳興
太守時年十六容貌偉麗神情秀朗雅性聰辯明習政事
高祖遣陳郡謝哲濟陽蔡景歷輔昌臨郡又遣吳郡杜之
偉授昌以經書昌讀書一覽便誦明於經義剖析如流